

移檄廉瓊高化以兵討之仕顯會諸郡兵七百餘船數十艘追及於澄邁之石礮港時寇沮新水窮蹙甚按兵嚴守可計日就擒總兵者不知應變督戰急屢諫不聽義士張友明等遂出戰俄而海南兵赴水走不可止寇乘勝四合諸官軍皆走惟仕顯及化州通判游弘道石龍簿木葉飛張友明力戰而死仕顯年三十九邦人慟之

明王翰河東人永樂中任府學教授嚴立規程

教誨不倦倭賊陷城官民皆逃匿翰整衣冠
端坐明倫堂賊至執之罵詈不屈遂遇害

羅紳江西宜春人天順中知石康縣清介公勤
廣西流寇劫入縣治紳率民苦戰力不能支
遂見執奮罵曰朝廷命我守封疆今日城陷
分死而已爾賊欲何爲遂遇害賊退民迎其
喪家祭巷哭如喪考妣先時其子鑑從紳會
兵於博白遇賊諸塗戰屢捷旋以兵少矢盡
遇害知府劉烜嘉其一門忠孝特爲作傳

滕漢山後興州人謙恭循禮博通子史精於騎射由廣東都指揮同知守備高州以平化州土賊功鎮巡令攝叅將巡哨高雷廉三郡成化三年西賊掠石康遂以十一月十六日犯靈山漢督官軍追之手刃賊酋數人奪回石康縣印餘賊敗走十萬山林莽間潛伏漢督兵乘勝嚴追誤陷坭淖賊復聚勒戰漢單騎大呼躍出且戰且翼士卒脫走猶以三矢斃三酋力戰創重而死賊亦驚畏遁去土人至

今悼其義烈云

高州志

歐陽福成化初年任靈山西鄉巡檢嘗奉府檄
率民兵至欽州魚洪等山禦賊死之其子通
奏訴於朝成化七年正月二十三日追贈福
爲廣東布政司照磨給敕命錄通國子監生
謝惠欽州所百戶領備倭事正德八年八月交
趾入寇惠率官軍禦於淡水灣賊衆兵寡力
戰死之

李嘉諭福建上杭人學正萬曆三十五年十二

月彝賊陷城執之諭罵詈不屈而死

祝國泰餘姚人武進士官濶洲中軍三十六年

正月二十六日彝船二百餘復寇欽州至龍

門泰領兵船衝之殺賊百計賊勢披靡明日

益衆來圍士卒以衆寡不敵爲言泰厲聲曰

龍門乃欽之咽喉萬一有失不重誤欽人乎

寧死無退與孔榕併力迎敵從辰至未力戰

不休會潮淺船膠遂遇害剖腹焚屍聞者傷

焉濶洲張遊擊立廟祀之

孔榕廉州所百戶萬曆三十六年管龍門總哨
與祝國泰協戰禦彝陷死人立廟祀之

朱子連合浦人廉營哨官彝賊乘龍門之勝進
薄州城子連率兵戰於朱家巷口手刃數賊
賊佯北子連追之遂被害

流寓傳

漢母將隆字君房東海蘭陵人累官冀州牧哀
帝卽位以高第入爲京兆尹遷執金吾忤倖
臣董賢等左遷沛郡都尉遷南郡太守王莽
少時慕與隆交隆不甚附哀帝崩莽秉政使
太司徒孔光奏隆前爲冀州牧治中山馮太
后獄寃陷無辜不宜處位在中土免官徙合
浦

郎中令冷褒黃門郎段熲初哀帝以定陶王入

卽位追尊定陶共王爲皇帝尊傅太后爲共
皇太后丁后爲共皇后褒猶奏言不宜復引
定陶藩國之名以冠大號宜爲共王立廟京
師大司徒師丹獨言非尊無二上之義上用
朱博議如褒猶言及平帝卽位莽白太皇太
后發掘二塚奪其璽綬更以民禮葬之定陶
隨廢其皇廟諸造議褒猶皆徙合浦

陰軼者南陽新野人也曾祖姑麗華爲光武后
陰氏自建武以來緣屬勲戚貴重當世軼女

弟和帝時選入掖庭以先後近屬故得爲貴
人有殊寵永元八年立爲后拜父綱爲屯騎
校尉軼以盛滿爲憂嘗密言於綱務自歛戢
十四年后以鄧貴人專房積忿不平與外祖
母鄧祀呪咀事發上使中常侍張慎等於掖
庭獄窮治事連后母朱等父綱自殺后被廢
以憂死朱家屬徙日南北景縣軼得徙合浦
至郡益自畏慎常以財物賄給貧乏閉戶涉
獵經史恂恂如儒士焉永初四年鄧太后詔

赦軼歸故郡給還家財百餘萬

或曰軼歸后一年合浦有

大杉葉飛入洛城占云其地出王者順帝疑之軼已家居乃免收繫蓋亦先世餘慶故得

保全云袁宏後漢紀

桓曄字文林沛國龍亢人也父鸞操行有名曄

尤修志介姑爲司空楊賜夫人初鸞卒姑赴

哀將至於傳舍整飭從者而後入曄心非之

及姑勞問終無所言號泣而已賜遣吏奉祠

因縣發取祠具曄拒不受後每至京師未嘗

舍宿楊氏其貞介若此賓客從者皆服其行